



1. juli 2007

Inatsisartut Forretningsorden-iani § 36 imm. 1 tunngavigalugu Naalakkersuisut apeqquteqaatinik makkunanga apeqquteqaateqarfiginarpakka:

Naalakkersuisut Nukik Seafood A/S-ip qaleralinnik 63.742 kilo-nik avammut tunisinisaanut 16. maj 2007 akuersissuteqarnerminnik Naalakkersuisut Nukik Seafood A/S nalunaaruteqarnerat pillugu Naalakkersuisunut apeqquteqaat.

(Inatsisartunut ilaasortaq Jens B. Frederiksen)

Aalisarnermut. Piniarnermut Nunalerinermullu Naalakkersuisup arlaleriarluni suliffeqarfiup Nukik Seafood A/S-ip 2006-ip upernaavani qaleralittassatut pissarsiaasa nunatsinni suliffissuarnut tulaanneqartarnissaat suliarineqartarnissaallu aalajangiusimallugu ersseqqissartarnikuuvaa.

Naalakkersuisup pineqartup § 36 tunngavigalugu apeqquteqaatinnut akissuteqarluni imaattumik allagaqarpoq.

”Nalinginnaasumik qalerallit Kalaallit-nunaanni suliffissuarni tunisassiarineqartarput, tamatumali siornatigut aalisariutini ammarterneqartarput, erlaviiarneqartarput, sikulersorneqarlutillu, imaluunniit qeritinneqartarlutik. Qalerallit sikulersukkat Kalaallit-nunaanni suliffissuarnut tulaanneqartarput, taakkunanilu niaquerneqartarlutik. Tunisassiat taakkua J-cut-inik taaneqartarput. Tamatuma kingorna aalisakkat nunanut allanut ingerlatinneqartarput tikiffiinilu tunisassiareqqinneqartarlutik, soorlu Japan-imi. Naalakkersuisoqarfik isumaqarpoq qalerallit taakkua Kallallit-nunaanni tisaneqaraluarpata suliffinnik amerlanerusunik pilersitsinermik kinguneqarsinnaagaluartoq. Taamaammat piumasaqaataavoq qaleralik tamakkiisumik, tassa 100%-imik suliffissuarnut tulaanneqartassasoq, tamakkiisumillu, tassa 100%-imik tisaneqartassalluni”

7. august 2006 Aalisarnermut, Piniarnermut Nunalerinermullu Naalakkersuisoq Inatsisartunut ilaasortap Johan Lund Olsen-ip (Inuit Ataqtigiit) apeqquteqaataanut akissuteqarnermini suli erseqqissuliorneruvoq:

“Nukik Seafood A/S”-imut aamma “Sigguk Kapital Grl ApS”-imut qaleralittassanik akuersissuteqarnermut pissuterpiaavoq qaleralittarineqartut Kalaallit-nunaanni aalisakkerivinnut tulaanneqartarnissaat tisaneqartarnissaallu piumasaqaatigineqarmat”

Uvanga apeqquteqaatinnut akissuteqarnermi kiisalu Inatsisartunut ilaasortap Johan Lund Olsen-ip apeqquteqaataanut akissuteqarnermi Inatsisartut inatsisaanni nr. 6 - 13. maj 1993-imeersoq, tassa naalakkersuisunut ilaasortat akisussaaffeqarnerannut tunngasoq toqqammavigineqarpoq. Tassa ilaatigut imaappoq, apeqquteqaatigut akissuteqaatit ilumoortuussapput, eqqortuussallutik, kiisalu paatsuungatitsinermik pilersitsissanngillat.

Tamakkua tunuliaqutaralugit Naalakkersuisut 16. maj 2007 ataatsimiinnerannit imaqarniliaq atuarakku tupaallassimaqaanga. Tassanimi imatut allassimasoqarpoq:

“Nukik Seafood A/S qaleralinnik avammut tunisaqarnissaanut akuersissuteqarneq.

Naalakkersuisut aalajangiuppaat Nukik Seafood A/S nalunaarfigineqassasoq Nukik Seafood A/S qaleralinnik 63.742kg.-nik avammut tunisaqarnissaat akuersissitigineqartoq”



Ilisimasakka naapertorlugit qalerallit pineqartut tisaneqarnikuunngillat, kisiannili imaassinnaavoq kukkusimassasunga. Taamaammallu Naalakkersuisut apeqquteqaatinik makkunanga apeq-quteqaateqarfigisariaqarsimavakka, taamaammallu Inatsisartut inatsisaat nr. 6 – 13. maj 1993-I-meersoq, tassa naalakkersuisunut ilaasortat akisussaaffeqarnerannut tunngassuteqartoq naapertorlugu akineqarnissara soorunami naatsorsuutigilluinnarakku:

1. Qalerallit Naalakkersuisut Nukik Seafood A/S-ip nunanut allanut tuniarnissaannut akuersisuteqarfigisimasaat Kalaallit-nunaanni aalisakkerivinnik tisaneqarsimappaat?
 - a. Akissutissaq angerneruppat, taava Naalakkersuisunut utoqqatsissutiga tigoqquvara, tassa pisariaqanngitsumik apeqquteqaammik nassiussinikkut Naalakkersuisut piffissajarsimassagakkit.
 - b. Akissuteqaalli naaggerneruppat, taava Naalakkersuisut qinnuvigerusuppakka apeqquteqaatit makkua akissuteqarfigeqqullugit.
2. Sooq Naalakkersuisut Inatsisartut Aalisarnermut, Piniarnermut Nunalerinermullu Ataatsimititaat aalajangernerminnik ilisimatissimanngilaat?
3. Nukik Seafood A/S qaleralinnik tisaneqanngitsunik avammut tunisinissaanut akuersissummik tunineqarsimanerannut suna pissutaava?
4. Nukik Seafood A/S qaleralittassat pissarsiarisimasani Kalaallit-nunaanni suliffissuarni siunertarinneqartutut suliarinnissimannginnerat, tassa tisannissimannginnerat Nukik Seafood A/S-imut qanoq kinguneqartinneqassava?
 - a. Qaleralittassatut pissarsiarineqarsimasut nunatsinni suliffissuarni tisaneqarsimannginnerisigut inuiaqatigiit annaasaqarnerinut matussusiissussamik Nukik Seafood A/S akiliisinneqarsinnaanissaat Naalakkersuisunit eqqarsaatigineqarsimanerluni?
5. Naalakkersuisut siunisami aammaarlutik aalisagartassanik taama naleqartigisunik suliffeqarfimmut pisassanik tunniussarnermut atatillugu piumasaqaataasunik taama erseqqitsigisumik malinninngitsumut tunniusseqqinnissaat pinngitsoorniarlugu Naalakkersuisut siunisami qanoq iliuuseqarnisaq takorloorpaat?
6. Naalakkersuisut apeqqummut tassunga atatillugu paasissutissamik soqutiginaateqarsinnaasumik allamik saqummiussinnaappaat?

Apeqquteqaatit pineqartut allaganngorlugit tiguneqarneranniit ullut qulit qaangiutsinnagit akisuteqaateqarfiginissaat kissaatigineqarpoq.